

夜

雨

秋

燈

錄

夜雨秋燈錄卷五

天長宣 鼎瘦梅雨著

卓二娘

彭澤孝廉朱景玉字東牆好狹斜遊家富有日撈金銀爲錦纏頭少娶吳氏貌美結褵二三日頗靜好旋就蕩婦宿稍飄之卽拂袖起誓以黃泉始相見吳鬱鬱幽憤死雖歸爲誓齋奠而心終不懌契友某疑止不平曰夫人貌端好較章臺柳色高百倍是何心性舍珍味而嗜瘡痂寧割席求明示生曰僕亦不自省無論鳩盤茶一入勾欄卽西子南威也近卽作文必於彼處始得成傑構否則枯腸而已食非娼不甘寢非娼不熟雖刀鋸鼎鑊不能易其性友聞之歎曰今而後敬聞命矣出而宣於衆戒桑梓無與婚生內顧之中饋急謀膠續媒灼去不面大怒以千

金買艷妾初亦靜好旋亦寵衰月餘態復萌妾勸之生怒曰賤人敢爾始誓繼擡妾亦死里中相誠曰生女寧作娼不嫁朱東墻生聞亦愧悔然顧空帷親遺鞋更覺岑寂益宿青樓不兩載棄已去其十之三里有謝氏卓二娘新寡貌僅中人體復羸弱願嫁生遣媒示意生不耐繇急允諾聘娶人恆爲二娘危而二娘自若也入門操作如貧家婦絕口不問前番事夫即歸晏惟問安否即枕上情濃時亦不問意中人若何生反愧愿曰僕有奇癖是天下女子所最惡者卿諳之乎二娘故詫曰男女體殊而性一床第瑣屑均同樂未知何事而好惡之懸殊請明告妾也生太息曰風月膏肓煙花銅疾耳二娘撫掌曰幸哉離也妾前夫日坐愁歎見粉頭而即頹妾時勸駕不許反得癆瘵死今得後夫若是妾願足矣言已袖與金帛遁令往生由是益放縱

偶晤馬媼問曰姥終日如穿花蝶如另有奇卉乞導引一豁眼界當酬以巨金媼曰郎又娶得床頭生菩薩第三尊不怕醋瓶倒耶生以二姬賢淑告媼媼曰陶公祠畔桃花門內新來江南白嫗携小嬌生四名均錢樹子第一爲西冒攫去第四美尤冠老身請爲郎執鞭生喜偕入門見庭宇雅潔筆床茶竈皆備架上鸚鵡呼曰郎君來姐姐燒好茶也牽珠簾拉生入諸婢含笑迂客躡髻綠羅裙已覺可人間媼曰姆卽前云大錢神耶曰然曰恐吾家四官見之當爲相思死詢四官曰已爲王天官公子携去看花夕方回引入小閣云卽四官香巢壁上詩箋極誇鶯燕床頭烏奩畔粉鏡邊釵已見一斑少頃阿二阿三來貌俱纖婉亦極奉承生神奪呼曰當老於是鄉媼急躡以足耳語生曰阿四尤巨媼毋遽示饑眸爲若輩小覷旋進珍羞窮治水陸

笙歌鼎沸各獻所長生乘間問芳名二曰巧雲三曰倩雲四曰  
亭雲二穩重三風騷時於席上傳眉語生雖迷惑而意在得寵  
頭僅含笑小酬應聽更柝轉忽見燈火一叢肩輿飛至婢挽美  
人出四也醉眼餽澀意態闌珊扶入香幃卽擁被寢生微睨之  
果如嫗言席終不去三曰郎若不畏河東吼何妨屈玉趾嫗笑  
曰大奇他家娘子能任郎君跳入雲霄去生亦誇耀三曰阿四  
沉醉恐失禮妾又陋不足攀龍鳳奈何嫗曰莫錯過卽與三官  
真是一對鴛鴦偶三曰不若妾爲四官權印務俟解醒郎與問  
罪師何如生恐拂其意卽携之所居室偃之坐見清雅繚曲案  
列文房曰卿女學士耶能書否曰問頗谿鴉實不成字問工吟  
否曰鼓兒詞未嘗不成句也解衣入帷意僅借紅娘解饑詎一  
張旗鼓覺另有一種奇趣令人銷魂真生平所未經者大惑爲

之盟山海三笑曰論郎表表惟四官方稱碗許米汁請留以灌  
四官妾不過代庖人也生愈迷極力纏綿日三竿猶未起婢入  
喚醒進以茶果詢四則又爲李侍御公子招去幸意全注三不  
復問鼎亦不復言歸鴛母遣婢索夜合資惟以片紙署押諭僕  
歸索二娘資如數與之甚捷一日得句黏壁曰魂被香籠魄粉  
薰此中溫暖更誰分從今莫憶秦淮月笑倚花前看白雲偶携  
三出遊歸見阿四坐案頭觀其詩大贊譽搦筆續箋立和曰溫  
臺荷席異香薰飽滿恩情已十分無怪阿三狂欲死宋郎詞藻  
艷於雲生自窻隙潛窺四覺急團其稿堅索始與閱之意更奪  
目煢煢似得三三窺其意笑曰代庖人瓜期屆也是夕卽送就  
四官寢牀愛殊甚然四美固冠其驕慢貪得尤冠生髮牀旣深  
不復計阿堵日遣僕索資甚急年餘三生一子一女四無出二

潛與生私亦生二子計迷於此者三年餘偶歸不常見卓均云  
歸寧計良得年餘索資漸以釵釧又以衣履且以書畫玩具來  
變質又年餘索忽斬因詈僕僕蹀躞至再携一冊來曰娘子傳  
語家中產已罄孑然一身實不能作娼飽郎欲問田宅曰貨去  
久矣生大驚閱其冊細疏支取年月田宅售價甚詳并云寶山  
已空日乞食於尼寺急趨歸尋卓則門戶猶是而主者已非詢  
之以妻卓賣券示問妻無耗尋僕忽不見僮僕無計再返白家  
則搬運一空玉人早散居停遣僕灑掃下逐客令煢煢顧影託  
足無區報而求依於親族不許無已寄古寺宿久之爲乞於村  
郭懸鵝百結呼號兩年西風驟來雞皮皴裂欲覓死無法意不  
若爲梁上君子得則苟且生犯則杖下斃猶勝於自戕窘且決  
夜潛越富家牆驚僕起蜂聚而攢毆之主人出卽前之契友某

也諭勿毆送公庭生呼曰卽速毆斃爲快某曰曷書券自任賊卽釋汝去不得已書與之某執券仍加以縛送至一處扁斗室中不加縲紲而監守甚嚴日給兩餐冷粥飯夜藉濕草眠久之聞官長坐堂皇呼已名卽有一役引伏階下堂上人呼生仰視則爲自家廳事東西坐者皆親族卓二娘鮮衣艷服立廡下白家三姬左右侍大駭首復頰斐卓曰嘻郎不肯一至於此乎諸長者均在更有何言妾當日若規諫是直驅郎死否則妾蹈前轍死妾愚不至此貸宅購三婦艷引郎入八陣圖若眞爲銷金鍋試問郎居四年何絕不一覩鴛母與他客面郎承祖父資已竭且爲丐與賊筆蹟在此非可以口舌爭妾烈守孤枕忍設醜局始保脂膏且督課耕織更有盈餘與郎無涉倘改悔請仍歸主人翁姬俱在妾亦不爭夕但手不許攬一文錢足不容踰一



重閨坐守安享以盡餘年若不遵請郎自便妾有子亦可守門  
楣不須蘂砧也長者均在耶曷早爲計生涕泣誓天日願如二  
娘言衆贊歎玉成始去卓爲生盥沐更新衣羈內室日周旋於  
妻妾間視屋宇更華阡陌更廣三子就傅已將能文皆二娘經  
營也始譴媼之勾姬之吟富家之獲皆二娘安排也由是改過  
遷善目覩子成名畢婚嫁壽八十猶抱孫不敢出門戶

澳儂氏曰孟光舉青玉案僅守現成之局文君作白頭吟徒興  
怨懟之辭卓哉二娘以不諫爲諫以不防爲防使易巾幘而鬚  
眉必能委曲求全善處家庭骨肉間也然而甘居再醮甘隨蕩  
子豈以良人早歿而不能展其所長歟抑另有宿緣而莫能守  
其故轍歟士君子生有奇才而急於自薦者皆二娘之流也噫  
嘻悲哉

丹青奇術

皖人鮑打滾畫士也能召亡寫真雖逝者逾十餘載鮑往墓上  
伏地一滾瞑目久之起則把筆鉤勒敷色渲染舉示其子孫戚  
屬無不驚爲酷肖人子思慕之極不能重見容範多樂與鮑遊  
以故倒屣爭趨聲價頗重一領皂色大布衫敝猶衣之蓋滾久  
無從收拾也然得資多供纏頭費尤嗜酒不羈爲君子所嫉皖  
北有謝君父早卒其兄以微員仕都中偶晤鮑邀至家啖爲其  
父傳神鮑如法寫就神頗似惟額下有八字紅血跡不可解詢  
於母蓋其父曾因公收刑部獄懼法自以黑索扼吭死故有此  
跡觀其顛冠藍頂其父生固八品者不可解次日其兄書來已  
爲太翁覃恩加級請三品封矣興化有陳孝子名嘉謨國初時  
增廣生員其父某與鹺商爭海地興訟商負銜之會其父往海

濱商喉竈丁毆之自踢其子死告於官往驗巡認爲其父踢殺  
訟兩年商遍賂當道遂以生父爲把持鹽務毆殺人命擬斬生  
號訴諸大府不直欲叩閭知秋決近恐不及禱於神不應日夜  
仰天泣目盡腫聞巡按御史將至揚急於神前刺血寫冤狀二  
通一藏於懷一捧於手油紙封固而標題之文甚長皆歷訴商  
橫吏貪父抱黑盆等語末有與其父死而兒亦死曷若兒先死  
而父可或生兩語尤爲酸鼻書成公服立河畔俟巡按官舫鳴  
鉦鼓樂從上流下兩岸有司跪接生乘其不備突於人叢中躍  
出大聲呼冤攤手中狀於官舫自投長河死巡按懸賞募撈救  
大索三日不能得撈出瓜洲口亦無耗翌晨巡按素服親祭於  
浮橋口風大作日色慘淡衆見水面豎一指出蓋尸猶矗立逆  
流中負出水面如生握拳透爪切齒穿齧置於岸僵立不仆巡

按親許代昭雪始仆閱懷中狀詞瑣而更哀立刻坐堂皇提人証審訊刑求商服遂斬商而出生爰於獄驗本籍邑宰善視生父厚殮生尸然後奏劾上下承審官請旌孝子祀入鄉賢刊事跡入邑乘詔許邑人建祠於學宮西隅春秋官祭私祭禮不衰至道光某甲子適鮑君來邑人痛孝子無遺像求寫真鮑以爲事隔百年難之邑人請益堅乃試往殯宮滾五次不可得恐損己名自剪爪髮刺血書疏文雜符籙焚於城隍神祠跪拜禹步久之懷紙筆就神座下宿囑廟祝無窺探漏三下萬籟寂見龕燈頓縮階下若人影往來甚夥兩廊各出一卒一長如山魃一短如樵僂互揖出門去少時聞柝聲鼓譟請鑰開門聲四褐衣人來伏階下白有詞卽見案上設符劍印信階下多執戟橫刀若大府體樂三奏神金冠蟒服呵殿出升堂坐貌古髯濃鬚已

斑白判事畢問褐衣人曰孝子來何遲曰孝子現爲嶺峒山都總管雲程尙二千里耳須臾鼓樂大震列炬如火城吏白孝子到神僮倭出迎禮甚恭肅入分東西坐孝子冠服甚都貌亦豐潤寒暄茗已神敬白鄉人意與蜚士疏孝子嘆嗟曰何必爾神曰鄉梓情深欲求音容爲後學樂燁俾瞻仰耳一朱衣吏請入西廂更衣少時復就坐則衣公服烏靴露頂貌極清癯少定卽更來時服再拜興辭神皇皇送之登輿去三揖而返燈光大放滿堂寂然鮑藩如夢醒卽抽毫就燈寫就天明舉示人與孝子曾孫骨氣同鮑未面也惟首無帽項無領蓋國初時公服上以尺布圍頸投波時領與帽飄去故其現形猶貌當年精術由是人益神其術後與揚州督李遊擊善李有雛婢小玉與變僮施姓私通李見而怒叱之兩小私遁竟無跡急延鮑恐之曰君

有術必能知渠所在如言之確當酬以重金若不語當以妖法收汝獄鮑不得已勉爲一滾卽伸紙遺墨畫長隄淺水疎柳數行一漁家門首囁聲屋後有覆艇微露男女足李逵役照圖捕果獲略審詰雙雙活瘞之鮑持金急遁走儀徵將過江夜從蕩婦宿甫登榻見婢與僕相摟自帷後出笑而招以手鮑大呼陽脫死於婦腹上

懊儂氏曰身有絕技不知斂藏猶買禍患弄怒潮者必溺斃戲竿杪者終墮亡況明明邪教且攫金而賣命者乎死婦腹上猶便易渠至孝子風采如旭日之常空如朝霞之映海英風凜凜千載如生固無日不在人心目間乞渠寫真本爲多事

### 范小仙

范小仙不知何許人與吾鄉城隍廟住持白道士友善白面貌

清癯性情恬適少慕勛勦之學不得其傳徒步走江西之龍虎山謁真人棲玉真觀隨法官葉某朝夕煉將功頗進三年後白忽思歸葉曰功成只一簣耳白終不欲須臾留葉贈一碩腹大牝驢縮以草繩云兩日卽到珂里但半途萬不可飲以水至則喂養亦可代步白拜別果兩日到由廟之後門入繫驢斗姥閣下入而解橐更衣叅師長并拜見同侶咸問何時離真人府具告之衆訝問跋涉何其速也以驢對衆走覘之驢烏有惟青草拴一大蝦蟆解之躍入水際不見白由是能召亡求雨諸法事至飛升吐納之妙則依舊茫然也一日范自他郡出指名訪白賓主間訊欲若平生終夜清談語甚玄妙白卽欣然留范下榻白長素而范則茹葷且嗜酒白非笑之范飲啖自若暇亦與邑之士大夫遊人咸愛其豪邁俊爽不以羽流目之工書善堪輿

然不輕言言必中一夕同白飲中庭視月色清潔冰鏡高懸滿地樹影若卽若離白樂甚告范曰如此良宵若有燈戲看庶不負此一輪范曰有燈戲所在亦並不遠頃正開場曷往觀乎白問何處曰去便諱其地言已以庭中長木凳自騎一半以半騎白囑閉目以兩手抱其腰曰慎勿遽開目違則墮地死矣白應之范咒曰起凳已騰空兩耳風颭颭聞江濤澎湃聲又人語喧譁聲旋鉦鼓齊鳴聲曰至矣凳已落於地白啓眸縱觀則一極大戲園士女如蟻莫不仰視臺上正演新劇滿場燈火開不夜天范與白同立凳上觀良久忽一禿髮短童一垂髻美女一鶴髮老叟一跛足乞丐聯臂踏歌嘻笑唱月來見范睇之笑似欲有語范急取袖中錢囊與白曰君若飢渴中有孔方可隨意用吾與故人略走走卽來白曰諾范跳下凳卽走入四人叢中且



語且笑且信步略轉瞬卽不見白痴候聽村雞四唱臺上撒鉦鼓收燈火觀者四散而范久不至白露坐以待至天明且卓午仍不至肩登往問行人云此爲毘陵城詎故鄉已五百餘里矣大窘痛罵范道士無良失信致受奔波苦意將乞食突憶錢囊捫之內有碎銀二三兩易之足敷川資時因納涼僅著短葛衫遂徒步肩登過江由竹西直至故里至則問廟傭云范公連日均在廟中並未出門一步往覘之則范猶酣臥未起呼而怨之范惟含笑問曰木凳棄之否曰自家長物能不携歸耶范笑曰吾固知君必不忍棄時白所主者廟之東房也多樓閣綿延三四進西房素貧無力建築內外皆平房范以爲乾方太塌若無樓廟必敗於邑亦大不便瞰廟西王氏宅尙有堂樓五間串樓五間年久欲傾頽王姓欲毀拆有成議范急往告王姓求勿毀

曰神爲一邑冥官廟卽關闕姓風水西偏處全賴瀛第樓爲靠  
廂若毀之恐均不利王姓曰樓將倒塌奈何曰吾有術在卽以  
竿木自上面挂之王姓曰樓望西傾子在東挂是速其倒也曰  
挂之可延數百年豈速之倒乎王姓亦姑妄聽之而竿木竟堅  
不可搖樓素危每風雨輒動搖至是竟無恙范於無人時便告  
白曰子知我遠來之意乎曰不知曰前生與子有緣特來邀子  
同往棲深谷習至道功成登金闕朝玉真子奈何戀塵瑣無  
去志乎曰吾原不耐岑寂始由江西歸耳不然至今尙未離龍  
虎山更能舍家園隨子浪飄泊耶范每與白觀火瞰井登絕巘  
涉危橋輒拉白同下白俱以爲幻術不深信在苒三年范忽謂  
白曰子旣不去吾亦欲歸矣明日遍別所與游者問何之曰遠  
甚遠甚時陳君習醫亦與范善問將去卽杯酌餞行求范曰君

有奇術必多良方今將別矣曷舉一二贈我亦可濟世行方便也范笑顧廳事西畔土牆一圀曰卽此便是催生藥時積雨數十日南山蛟水大發巨浪圍女牆范歸拉白登城俯視大水久之曰此中有佳境吾與子投入何如白不肯范太息曰子所謂有仙緣無仙骨者雖然吾先以術堅子信亦可登出袖出匹布長十餘丈向空一擲卽成危橋若接霄漢曰吾試與子遊月宮好否白堅立不肯登范遂揖而後登聳身躍入空際人影依稀突布墮范亦墮投水中風挾洪濤兩三捲則人布俱杳白大聲呼救已無及歸而涕泣以爲范小仙左道自殺飽魚腹矣明日客有自邗江回者携扇訪白云昨在東門浮橋遇范渠云行時誤携君扇屬乘便返璧白視之果已扇至是始悟范真仙去也又十餘年王姓不能守范約巡拆樓工人以石杵墜去竿木有

金光一道大聲若雷樓主在巾樓上突顛下幾斃陳姓遇有難產者姑以牆土試之頗驗然施送則驗索謝則不驗遠近聞之爭來索土不兩載土牆無一撮之多矣余童時猶在廟之東房見正中懸豐干禪師騎虎像又樓上懸白屈銜芝圖筆墨秀逸翛然出塵道士云爲小仙遺筆未知真贋耳

懷農氏曰苦口婆心百計草悟古人處君父師友間藥石爲仇者均不外是然猶得曰吾君父也吾師友也吾非得已也吾盡其在己之道也若范與之白生不同井道不同門秦越殊途一朝邂逅顧白已桎縛其體膠糊其心清真之風蕩無從入猶復於洪濤汨沒之後道出廣陵寄歸便面其將以此自炫耶抑使彼悟而深悔耶噫白固痴而范亦痴

郁綠雲

來安山中富室郁道生良田千頃華屋百椽牛羊千蹄而胸無  
點墨娶歙人鮑姓十姑貌美通書史惟隱嘆乃夫忒俚鄙孕十  
五月產一女名曰綠雲因設悅時有綠雲一線自北斗邊降中  
庭云女生而識字目下十行再得慈母訓五六歲卽卓犖觀書  
史搖筆爲文章母喜曰此吾家女學士也曹大家管仲姬有替  
人矣翁因十姑生女後久不作繭娶細妓金關爲妾嬖暱殊深  
鮑略爭夕金關嬌啼進譏譖造黑白翁惑之然尙念結髮情金  
關又私埋木人於後圃乘翁種花時故刷出上有翁名氏八字  
符籙若蚓翁見之大怒以爲暗算巫蠱必十姑妬嫉所爲乃肩  
之幽室將設馬廐之謀女時甫十二齡偵知之夜穴牆壁扶母  
出藏東隣家仍回房闔臥翁始猶叫噪繼知之亦憐其孝置不  
問仍招十姑歸然由此反目恩斷義絕覩面無一言十姑幽鬱

冤憤久得沈疴誓不服藥遂逝女心痛不敢哭惟枕上多淚寢  
翁寵妾爲嫡翁女母事之女貌極溫柔而行動皆不合繼母意  
始毒醫繼痛楚翁左袒殊難久益昏瞽易怒過度雞骨支離念  
得病將踰思族中惟一從弟玉生邀至與訣伏枕哀泣云兄無  
後只此弱息乞吾弟照看之田產饒沃渠皆巾幗何能爲乞爲  
覓一佳婿贅作吾嗣析產爲二弟得半與半可也玉生一一敬  
諾翁目旋瞑女哀哭盡禮而金關御脂粉壓紫肉如平時女對  
主哭失聲金關怒曰呱呱者殊可厭也立毀其容使雜家人婦  
中供操作女潛訴於叔玉生怫然曰渠汝母也母之教女有何  
不是處久之醫屢益慘女再訴於叔玉生曰是由爾之不能承  
順也母縱虐卽質訴官庭又將奈何金關潛知之益凌女而德  
玉生從此家事咸聽玉生之命是行潔廚掃榻館玉生飲食豐

甚夕與玉生絮聒恆中夜始散一日授女以鞭命牧豕女掩淚  
去晨出夕歸食僅與脫粟一甌花容月貌頗作雞皮皴途遇叔  
伏叩泣訴玉生耳如不聞將掩面走女牽衣使止曰叔乎奈何  
忘我死父贈產託孤之遺囑乎玉生怒曰小妮子宜其遭鞭笞  
爾父贈我產非爾產也託孤一言雖有憑證其如汝之偏強何  
祖父數世均未分析何得言贈且虐汝者汝母也非叔也再饒  
舌卽直陳於汝母言已拂袖去時金闕又有中表弟王禽來與  
玉生結酒肉交禽瞰女貌謀欲汚之東隣白七姑覺而私洩於  
女大懼曰是真不可留矣棄豕逸入東山巖深處坵面蓬頭棲  
止山穴飢食野簋渴飲澗泉得不死年餘見澗底有草亭亭如  
筆管根團結如蕢芽食之味甘卽蓄爲禦冬計洞穴大可容膝  
攜石爲門藉草作榻斷門前徇路其境更幽久則身輕大壑能

越山中無歷日瞬又好春女思旣無拘束大可出遊東南諸山窮極登覽偶至都梁之牧羊山俗云龍女牧羊處遂仰天大哭曰龍女獲罪舅姑而牧羊奴獲罪繼母而牧豕然龍女得柳毅傳書尙有還宮之日奴所遭若是欲寄書於地下父母庸可得乎言已大慟烟林宿鳥嘈雜驚飛忽對崖一垂髻女子持鴉鋤携筠籃若畫上探藥仙童狀向女招手女知其非人然亦不怖拭淚趨就對坐巖石上垂髻人曰適聞子言似是閨秀然尙非眞通者涇河距此甚遙何預龍女事山之所以名牧羊者乃楚懷王孫心牧羊處耳項梁求得立爲義帝都盱眙旋爲黔布所弑難及長公主積薪自焚奴畢姓名岫英字女須三阿亭長女白晝殺父仇於市帝憐之赦而沒爲宮奴時得公主憐故以身殉同焚死上帝憐鑒勅主爲此山之神都梁石梁兩邑之薄命



女子皆歸主管各有所司奴則專司採藥女慘然曰然則姊爲鬼乎曰何得仍爲鬼也曰仙乎曰尙不得謂之仙然羽化有時耳頃聞子慟想亦傷心人曷告我顛末女洒淚纓陳且哀哀乞拯曰將若何曰姊姊不棄收作泥中人或亦可以分勞乎岫審度久之曰且同歸哀於主或有主僕分若作子夏之門人小子則吾豈敢女喜尾之行落照墮崦嵫林木深處忽現一宮殿偉麗非常中有美人數十輩風裳月帔皆非時世妝或倚樹聽泉或秉拂趺坐或調鸚鵡或披鳳皇或小聚清談或獨立遐矚岫曰此皆執事人也衆見岫爭迎曰岫姊歸何晏耶岫笑曰偶然拾得一下界人是有慧根而遭奇厄者遂代爲陳述且令女與衆間訊然後引謁公主言所由來女伏叩階下偷睨殿上坐一黃裳美女子侍立者卽入門所見諸人主啓齒微笑曰來大好

且隨阿岫小住晨起採藥毋惜女叩謝已卽詣岫室寢同榻食  
同案親愛若同胞岫又私授健步丹藥一粒吞之山行若飛凡  
山川古蹟女問之岫無不確鑿以對女由是更事之如傳不敢  
目爲姊妹行居二年主另遣他婢採藥命岫掌小瑯環典籍女  
副之鴻文寶笈人世所無朝夕研磨岫更爲之講解遂通內典  
且習遁禽其中有劍訣一冊最合己意潛自演習岫知之笑曰  
妹將學妙手空空兒乎曰然曰妹有幽恨學此恐非所宜也然  
無神人授以秘寶學亦不成徒擣清課耳一日庭前木芍花開  
燦爛如火公主開尊賞讌侍者各奏技或管絃或歌舞或獻書  
畫岫則以手探都梁香草爲壽女時立階下主顧之笑曰女學  
士何絕無所長耶女應命而起取壁上長劍之雌雄者檀袖舞  
翩翩飄風疾雨寒光逼人公主正擊節忽一美人奔白程太夫

人齋天符至公主起更衣朝服執笏焚香祇迓岫私告女曰此東  
陽程嬰母也旋見夫人跨鶴降於庭公主匍匐夫人宣云九霄  
靈寶天尊玉清帝主詔曰下界前義帝女楚姑生而婉淑靜貞  
歿更英烈慘孝風雲咤叱青史留香火燄銷鎔紅顏有淚彼姬  
隨離逝后號雉淫者視姑之閨範懸雞鳳乎前勅姑爲牧羊山  
神又復感化其氓精勤厥職實無愧天潢之裔忍久羈地祇之  
流茲勅程安人親來迓汝升金闕朝玉妃謫滿歸真勳高錫爵  
噫投山前木石可憐精衛銜冤看雲路旌旗聊代媯皇補恨欽  
哉主舞蹈謝恩訖與夫人相見叙寒暄龍肝麟脯潔膳欸留岫  
泫然告女曰吾輩侍主蹕上升妹尙凡體奈何然良晤亦正自  
不速有數在耳女忽奉主喚入驗曰子有仙骨而性氣未平未  
敢授以大道今且別矣聊以一物相贈言已袖出兩白丸令吞

服曰此劍九也頃因舞劍故投其所好耳然宜謹誌莫妄殺人他日山陰道上有跛足少年負葫蘆者子婿也功成當重見我女方戀戀王已策鳳程仍跨鶴餘皆乘錦禽力士前驅香風遠引霎時飛入空際女仰矚不見其影回視宮殿全無惟亂石流泉而已大哭失聲時滁陽牧高公適謁太夫人就養道出於此見女作道家粧哭於岐路太夫人素仁慈招致車前殷殷詳詢女詭以孑然無依投親失路爲對太夫人携之歸作赤脚小婢周旋伺應處處得人憐太夫人尤寵愛其東隣曰七姑者亦尋夫至此人云近同友人塞外流落此邑乃傭於署女晤之大驚喜私詢家事曰云姑去後金關先亂於玉繼亂於禽所有盡償梟雉積逋先尊人遺產蕩然矣不知近作何狀猶記出門時見其所往來者非人也女慘然流涕堅乞無漏言會州牧以嬌女

下嫁於隣封某明府之子綵輿鼓吹甫逾清流關忽驛從奔回  
喘息曰中途遇盜攫女公子入山巢矣一門窘急無計忽曰飭  
役捕忽云會營勦女聞之抗聲曰是皆非良策也夫女子所重  
者惟有潔耳若輾轉逾一宵雖瀚以西江之水已無及矣眾曰  
然則奈何曰婢子不才願爲一往言已卽如鳥之縱翼忽不見  
眾愈驚駭不知所云夜三更新月挂樹杪金柝交鳴眾痴對如  
木偶忽聞簾際有人云幸不辱命竊得掌上珍珠還也旋即墮  
地視之果女且負女公子至斯時雞犬不驚漏甫三轉眾聞詢  
之女公子云賊之甫攫去也閉置斗室旋有男子至意在逼姦  
搗拒呼號苦無死所忽有白光一線自窗隙入涼颼颼然視盜  
首已墮地婢亦至遽負於背御風行始生還耳眾方知其爲非  
常人向殊昧於物色大加敬禮而女無驕矜態太夫人問所操

何術女不言詢再三白七姑始述其繼母惡叔虐逼入山之由然究不省其術之神也太夫人問之大不平云兒之術紅線與隱娘也蹈虎穴攫鳳雛且易如反掌更何難潛回故居手刃此賊女曰如太夫人言誠易事耳然兒非若輩之凌逼則不過以田舍婦終何能有此薄技且酬報之何必定汚吾刃太夫人益欽其容物謀爲作伐意卽娶其孫公子也女知之夜告白曰吾蹤跡已露難久居然此處不日有盜警危矣哉白問何以抵禦女自脫指上鐵箭環授白曰他日難及姐以環遙擲之盜卽獲問何之曰天涯海角耳聞更有何囑曰姐姐過回煩照看先人之殯宮感且不朽言已抵足眠清晨視之杳矣遍覓無跡太夫人更悼歎然無如何久亦遂已白之夫近亦從塞外回道出於滌夫婦會合正欲辭旋數夕果有盜衆踰垣入內宅短衣錦帕

持利刃帶假面具四十餘人牧奉母潛候媼宅餘皆藏匿盜謀登樓肆搜括白之夫抽刃欲起白急止之曰吾有郁姑至寶今夕可用矣如女言擲之環忽放光如火燄下撲又如獵網四垂盡覆諸盜使不得出白之夫闢門大呼衆役闖進咸與黑索套頸如犬羊而鐵環亦竟杳然牧高坐堂皇研訊云爾輩訥訥而來何遽自縛曰小人等正擬拾階級以進忽有火光自頂上落卽如身陷獄中不容動一步再訊則知前奪女公子者亦卽若輩所爲問盜魁何人衆囚前伏三人泣曰吾輩皆賭博場中無賴子耳爲受伊等蠱惑遂至此復何言與問三人何名則一名郁玉生一名王禽尾一人名金關蓋女易男粧者也繩妓近綠林近因窘故再習舊業耳牧聞之大駭使白之夫婦曉之云不誣遂取供申詳然後斬於東市白告歸牧奉母命厚酬之後數

年收辭官歸閩僕夫車馬行亂山中方有戒心忽見女作劍粧偕一跛足葫蘆之男子拜伏車前曰奴已嫁得婿知大人至特來問太夫人安否前途雖多伏莽然兒已剪除之矣請安輪前進無怖也牧尙欲諮白女遽致聲珍重化作彩雲一線冉冉向西去跛足葫蘆之男子亦杳適太夫人後車繼至宰翹白所見太夫人更惋惜浩歎不輟白夫婦歸來安以牧之所酬省略營運遂市田產稱小康一夜方閨中斟酌賞秋月忽空際墮一物聲鏗然旋聞雲際有女子聲曰吾畢岫英也奉楚姑羞遣省義帝陵途遇妹綠雲盛稱賢伉儷不負所託煩順路以不腆奉寄耳旋覺彩雲東去玉人無聲俯拾之則彩袱包黃金二錠遂詣郁翁媼之墓盛加封植清明寒食夫婦具漿飯茶酒錢往墓呼女名哭而奠之數十年無間斷



樟柳柳

張大眼者催租隸也一日五更起賃賃入城完秋賦時正酷暑晨風清涼行至秋稼灣日漸上熱其路旁有人家茅舍門閉主猶酣寢門外搭荳花棚蔓延接髡柳下有兩石磴頗潔潄露水猶濕遂拭以布巾就坐小憩鑽火吸烟忽聞棚上有歌者聲嗽嗽如秋後都了吟傾聽之歌曰郎在東來妾在西小小兩個不相離自從接了媒紅訂朝朝相遇把頭抵抵頭莫碰荳花架一碰露水濕郎衣大眼聞之駭詫欲絕周廻細訊則一小木雕嬰孩粉面朱唇眉目端好長二寸許趑趑躍躍荳花上笑容猶可掬也然却爲一縷頭髮纏頭扣棚隙葉葉上不能逸大眼心知其爲樟柳柳必茅屋中有術人止宿夕繫於此喫露水耳素審其靈妙能報未來事卽斷髮攀腕中戴笠西行將見城垣腕中躍

躍若不安急珍藏於笠內果安旋小語曰張大眼好大胆來捉咱一千銅錢三十板言之不輟大眼心計完納不虧何至于笞責聽言如不聞甫進城邑宰王公適呵導出行香見大眼心急足忙疑爲匪呼從者執之伏地問伊誰大眼語鈍滯喘息流汗不能達宰怒曰非良善者盡笞之笞三十大眼伏街上大笑宰問笞必痛何反軒渠耶曰小人預知有三十板之厄今果然始笑耳宰婉訊之大眼具述已爲租隸路得樟柳神預告受杖等語宰命以神獻大眼卽於笠中取出呈上宰輿中詳審知有靈立命賞給青蚨一竿以慰其冤責宰由是聽獄必以神置帽中坐堂皇爲兩造預言曲直如目覩人爭誦神明比諸虛堂懸銳無微不燭而不知公帽中有樟柳神也公後卒爲吾鄉城隍甚靈

懷儂氏曰近有人親往姑蘇從巫蠱家買一樟柳神而回意可以未卜先知矣詎神殊緘默所報者無非鼠動雞啼鴉噪等事且夜伏枕畔嘵嘵煩瑣攪夢不酣及問以他事稍有關係者皆對以不知私問何故曰懼禍耳噫鬼且懼禍人可知矣

### 木孩童

諸妹子不知何處人少無賴嗜飲好博日漸困窘乃以後庭誘市非兒與之遊年二十有五色衰人皆唾棄而飲博如故無已惟稍稍學穿窬夏日戴草笠行隴畝間瞰禾苗深處若有男女足微動潛詣其側則果有野合者在焉乘紫白羅紗衫褲於左裸抱正濃諸攫而脅之男女咸起欲遁索衣不與伏地哀祈諸視其女頗有色曰若肯與我依樣云云即與爾女不肯男勸之曰無奈何姑從之免播揚耳女含羞與合男坐伺於側踴躍焉

堪事訖又脅其男曰爾太便易當髀腰繫與我作賭本始與爾衣男云私約到此實未携得分文奈何旣而凝思久之曰然僕雖無持贈然有一處指君去可得大財問何所曰去此而南林中有古精藍破廢無住持第入叵中殿地有卵石數十枚堆作一團君卽拾廟外纍纍者之一添其上龜後僊臥待少頃有十餘男子來瓜分阿堵君出數石自有分詣曰諸擲衣與之男女着而急竄繞過古墓道突不見趨入林果有廟果無僧衆而地果有石子遂如其所說臥而俟及昏黑有男子二人進廟數石子得十二枚訝曰何故多一石子豈有新來之不速客乎旋又陸續數男子至至皆豹頭環眼腰下橫刀先來者與客寒暄且告以異衆曰我輩已有十一若添一佳賓成闕于數矣曷搜取諸自龜後掘然起出與爲禮衆曰子旣來緣也曷同去打黑風

得財當分贈然須訂盟共生死諸曰諾固所願也乃於神前瀝血爲誓禱拜訖衆有携來酒肴團坐飽啖衆問諸曰此等生涯子見慣乎抑初學乎曰不敢欺若踰牆鑽穴弟所優爲餘非所知也曰如是亦佳子到彼第先入探虛實啓門戶隨出伏暗處防外來曰善夜靜聽村柝轉三更衆曰是其時矣各執堅利與諸以械蜂擁魚貫行踰數壘岡阜至一極大孤村重扉嚴鑪燈火全無而左右皆山巖水沿絕少比隣然舍宇鱗接知爲大家衆曰新來同盟可先入瞰之諸乃踰數重垣直達內寢各室皆黑惟西廂窻牖時露燈光驚伏蛇行以唾濕窗上紙微破睨之一四十歲半老佳人高坐床第搖箴招涼一二十餘歲佳人着輕縠碧紗袴襪對鏡勻鉛粉卸晚粧一十六七歲小女子髮垂垂尤艷絕三人皆弱不勝衣臨風欲化者小女子抱小孩童尺

許白如雪瑩如玉呱呱啼不輟女子且弄且怨曰連日阿官甚不乖夜深猶呱呱不肯睡對鏡人笑曰渠是姑姑嬌慣埋怨誰耶床上人曰將阿官來與我果送之床上老幼共調笑對鏡人忽唏噓曰蓮姑莫怨阿官令伯仲至今不歸險不教你兩嫂嫂孤寂煞幸有此福樛物鬪笑耍也牀上人曰蓮姑兩哥哥不在家莫貪耍忘却門戶小女子笑曰妹子痴耶深野孤村妹時時怕有綠林覷夕照銜山時已重軍門閉矣對鏡人曰倘有惡人來我妯娌落得一死未免苦妹與阿官耳女子急搖手曰莫道莫道嫂何必故作險語令人怕約再遲二三日大哥縱耽延二哥亦斷無不遄回也燈花結如紅豆子有徵驗矣牀上人曰小妮子只記得二哥不想念大哥耶今夕盍仍是三人同榻俾膽子稍壯女子笑曰二嫂睡態不雅相動輒翹纖足壓人肩頭對

鏡人粧亦竟笑罵移時掩闥移燈遂下帷同寢長者鼾聲漸酣  
孩童啼聲亦止諸窺瞰多時心喜急循廳事出欲拔關則門皆  
暗門機鍵牢固無已仍踰垣出縷述所以衆亦喜遂囑諸在外  
各皆登屋詣內飛行鴛瓦上曲折數道視燈光聳身躍落伏諸  
窺處窺之果聞牀上有婦齁酣眠聲滿屋箱笈扃鐺甚豐意雌  
物無能窺忽放胆拔刀破窓入燈光大明掀帳視之則空無一  
人舉箱笈啓之皆空無一物遍屋窮搜絕無人跡知有變仍踞  
登屋甫過樓角則先行者無故墮地死陸續進者二人亦然其  
餘見樓角有刀光急轉而之北視下有小園擬自彼處遁突屋  
後飛出一人乃對鏡人也手起刀落連殲者又五人僅脫其四  
茫茫無所之大呼躍落庭院則年長者已自後刀落斷其首矣  
諸在外痴守至東方將白而衆仍不出聽之亦無聲息意衆俱

得采各擁婦眠滿懷妬念登牆外高樹潛窺則衆皆身首異處無一完軀大驚而下欲進不敢欲退又以同盟之誼不忍乃潛伏草堆中姑窺其變少頃日出聞小女子啓莊門兩婦人亦均出外四望笑曰惡賊無故來送死又欲累老娘親手壅渠好做倖也小女子問壅之何處或曰水邊或曰林下商量多時遂定爲南岡頭小女子果携鋤先去兩婦人陸續抬尸出血泔泔染畦町諸心慘然及見其抬盡心計娘子軍全在野田室內尙有嬰兒何不潛入殺却爲同盟報仇意決乃踰垣入拾地上刀奔進繃闔視兒尙仰臥鼻息啾啾遽揮以刃意兩段矣詎聲如破柝視之蓋木頭雕成也大驚欲反遁突一白髮老嫗龍鍾非常以杖支門問子何來敢入人家閨閣且殺人家孩童乎諸藐其老甫擬以刃嫗笑曰子欺我衰邁耶若以杖擊汝終非好手駢



二指擊諸肩痛如中斧鑕不覺伏地哀號視嫗後又立一婢抱孩童來方是昨宵英物兩婦携姑旋歸嫗婢爭告之婦曰噫如此物事亦學作賊真辱抹煞人汝在草堆中賊瞳灼灼以我曾寓目耶姑念汝爲手足報仇尙有義氣免汚吾刃且就縲紲俟吾夫回再發落汝言已婢付孩於小女子出黑索綰諸頸若牽犬羊扇之斗室日與兩餐頗甘旨尙無苦至三日忽聞女子喜曰大哥二哥回矣又聞婦喜曰郎君又携得妹夫回矣旋聞男子勞婦與妹曰吾兄弟遠遊子等殺得好賊言已均軒渠一家宴燕笙管噉嘈中夜方止次日始聞大郎坐中堂命婢引諸出伏塔下若囚之就決者殼骸非常潛視堂上三人皆冠玉美男子惟大郎鬚鬣有鬚嘗曰吾道誰原是市上無賴諸妹子耶前宵之舉罪不在子但不應圖滅人後此等便非丈夫宜其雄

而雌也且吾友盜隣婦野合于爾何事爾脅淫其偶又詐取其金此等惡頑童宇宙間真一刻容不得言已擲刀下令自死諸哀叩不已滿堂皆失笑二郎曰姑貸爾命喝左右健兒且成就渠作留聲半釋迦衆曰善兩健兒果縛諸於柱出薄刃如紙脫布袴宮之血淋漓滿地昏而復甦健兒笑敷以藥痛頓止大郎笑曰者般方成個妹子也擲數金與之立命人送出村躑躅田間旋走旋憩兩日始回舊處見日前所遇男婦遙遙視之笑諸憤極拾地下卵石投之兩人皆化作白狐竄去年餘里之大家被盜劫聞於官諸潛告捕役會同營弁百餘人重至舊處則村舍全無荒烟零落衆於草中拾一木雕孩童諸見木上有伊舊斫刀痕仍如故云

懊僕氏曰以盜殺盜所謂以豹狼而戮梟獍者也使諸妹子若

非同盟一念之義又安得獲保首領僅爲天病已乎龍腸小兒身有淫具本無用之物二郎刑罰可謂當矣

### 古劍鐵

篆刻家牙石竹根無不捉刀惟玉章堅硬輒見之生長或曰蟾餘賸蝨之軟如蠟金鋼石鑽之爛如泥試之均不驗歛有方生雪蓬刀法得家傳然刻玉亦深恨不能得利器偶遊揚州市上見骨董家有古鐵一方苔花斑剝隱有篆文較以秦尺長五寸許寬一寸許知爲古物悄以青蚨二百購之歸試削磁玉紛紛落然笨拙無鋒芒規角不能刻懸針蠶尾就石磨礪石損而鍊無恙送諸冶師改鐵筆鏤中三日如紅蓮花瓣取出火卽堅不能剖不能捲遍詢冶師皆不知其原與訣旋游蘇臺訪之聞人云餘杭西湖邊有仲叟世傳鑄刀劍或有祕密法生訪之

果有叟鬚眉如霜雪溫雅若儒生以鐵示之并告以故求玉成  
叟曰不意垂暮年尙能寓目眼福不淺哉曰是究何物曰此昆  
吾古劍頭也鐵之祖若父曾言之而未能見僕馬齒加長見僅  
第一次成就自有法然工值須朱提二百金方可生以值太昂  
出五十金不可再加一倍仍不可笑曰此寶物也五金之精凝  
結於此又入土久得山川秀已通靈煉得法可得鐵筆三枝不  
假雕琢一鑄石較之泛常銅器已無敵二鑄銅鐵之屬三鑄品  
玉之屬如刀斫木其指揮如意真無上品售一卽千金區區工  
值尙以爲昂乎生怒攜之去曰郎君莫錯過僕衰老將就木倘  
過此則茫茫天壤永無能辨者其負此寶物乎生不聽竟去奔  
馳三年迄無一遇不得已仍往覓叟願如數爲酬叟曰郎君旣  
去又何必來論僣強當見絕然僕欲爲人間多一寶盍先以金

來明晨坐視炊許時卽成生晨卽携金往先兌與叟叟邀生坐  
肆門品茶童子開鑪炎炎甚熾叟亦坐與生閒話倏一女丐來  
污穢非常而垢盈掬叟呼丐坐矮几上酬青蚨二百願代爲櫛  
髮丐得錢亦不問云何聽之叟高坐袖出小梳爲丐櫛之髮垢  
已兩捧遺丐去旋又呼丐如法爲之垢更多已乃對鑪端坐  
口喃喃若勸勒者多時塗垢於鐵就火灼灼復塗塗復灼如是  
十餘次垢盡矣鐵忽放五色光耀作奇響視之已判爲三端正  
條直取出略煅煉卽爲鐫文一曰切玉二曰斷金三曰鑄雲又  
出紅石如瑪瑙磨須臾卽湛湛如碧芙蓉利刃也叟拂拭付生  
曰願耶君世世珍藏勿墮勿棄生携歸急試玉之至老者無堅  
不入遂仍返竹西日賣篆玉章一字銀一兩索刻者戶外履常  
滿由此大富惜戚豐三年匪至城陷生且不知何所歸矣

懊儂氏曰炊米之杪斷戟同沉瀣指之柔做帶誰惜天下不完之物豈盡廢材耶要在無正法眼藏耳噫薛燭不逢張華已渺茫茫天壤知己何人

痴蘭院主

詩臣既述朱君還魂事又述其妹朱貞女生死本末尤足豔稱朱本巨族其尊人負郭覓幽境築別墅供吟嘯花草甚夥牡丹一株姚黃也稱巨擘而蘭尤富焉園丁谷姓其婦盆婆子同任灌溉勞花時游屐往來藉賣苦茗博蠅頭利蘭之種素心者爲上紫心者次之並蒂者尤不數數見墅中素心者僅蓄一本夙珍愛是年光風乍轉奇馨勝常忽一夕紫者咸化爲素又本本皆作並蒂若夫妻慙三四日旋復本質而封姨肆虐落英滿階盆婆子亦有愛花癖往告主人意似惋惜一夕自鄰村社飲回

扶醉踏月經短牆外聞壁中有女子言笑聲偷瞰之則倚石坐者爲黃幘美婦人席苔坐者爲縞衣美女子左右侍者嬌鬟三四輩語細不可辨忽聞婦曰小妮子弄狡獪無怪封家婢妬欲死女笑曰兒本太憨生偶爲諸姊妹袒衷曲不意遭奇虐近亦自悔恨婦曰兒過矣顛倒生物上帝所忌況自家形骸乎然則封家婢饒舌奈何女子聞之掩袖汎瀾不歡而散婆子歸告其夫皆不解由是時伺於牆外冀窮底蘊然仙蹤杳矣一夕正夜續忽聞壁中有絲竹聲泣別聲走覘之則遙見黃幘婦手白玉筓斟清泉灌素心祝曰汝不自悶過炫露果爲封氏劾往墮閨秀情痴劫當於十六年後早證果勿迷本性也祝已灑涕不已諸婢勸慰始含淚走入牡丹叢不見婆子驚詫翌告於朱之夫人則正於昨夕生一女公子夢蘭而誕彼此互述始讞生女之

爲素心後身遂名曰級蘭夫人生子四女二級蘭行五人呼五姑爲父母所鍾愛明年尊人茂才公捐館母夫人自坐絳幔卽教子女級蘭幼穎敏親麗性貞學繙之餘好吟詠夫人每語人曰此吾家女學士也瀟湘入夢巾幗謫仙惜爾翁不克見其詠絮才爲可悲耳女偶詠秋海棠自云秋雨又秋風苔陰瘦一叢如何人不寐淚洒可憐紅母聞之不懌曰是兒何語出不祥遂藏其卷冊翰墨專督女紅不容習咕呬女雖遵慈訓然往往倚窗調鸚鵡捲簾放歸燕臨水數游魚口常喃喃偷吟之皆絕妙好詞也顧性最好蘭見蘭又嬌啼不輟堅之素心者自女設悅後卽頓萎盆婆子護以竹欄仍勤澆灌冀再萌耳七歲時早許字成都守張公子本與女爲中表兄妹行兩小無猜曾共梨棗至十歲時卽走匿不面公子素羸弱隨任之蜀鯉魚音斷又六



年女忽持齋朝夕稽首拜大士像。諷心經。母詢何意。則淚泫泫焉。時正早春。半窓旭日。女擁絳被不起。淚雨濕枕簟。幾滿婢白於母。詢之。嗚咽曰。兒不孝。將長辭阿母。負教育恩矣。幸有兄妹在。願母勉加餐。毋以薄命女爲念。母悲曰。兒何出此言。泣曰。兒昨夢張郎來。擲枯蘭一枝於地。再拜辭出。兒知其必赴修文矣。母素譴公子。病聞女言。心若割。勉慰之。而女由是竟毀粧食。頓減月餘。羸中毳毼。至公子果死。母背女哭。秘不使聞。女忽晨起對鏡。理粧。問婢曰。盆婆子來乎。曰。未。又問。壁中素心蘭。再生乎。曰。不知。問亭畔黃牡丹。無恙乎。曰。無恙。旣而解頤曰。來處來去處去。自家苦問訊。誠恐封姨笑人。旋又悲涕曰。悔不聽姚夫人語。一至於此。婢見其或哭或啼。狀類顛急。白夫人。偕兄妹至。女笑曰。偶與婢子嬉耳。何遽驚高堂。言已舉止如故。防遂漸疎。然

每夕輒扶病挑燈繕詩稿成一帙題曰別鵲吟稿成泣拜其母  
曰乞以此卷寄已蜀焚亡者靈前以當同穴時盆婆子不知也  
忽見已萎之素心頓發舊叢含苞怒放香更襲人是夜又聞絃  
管嘔啞人馬雜遝啓雙柴則見燈火若城旗旆如雲侍從策花  
廳皆古裝擁一綵輿冉冉門外過輿中麗人五姑紉蘭也婆子  
遽挽輿呼曰五姑將焉往鹵簿怒欲加鞭笞女曰莫驚他此吾  
家守園人然汝來大好煩寄語高堂云我赴詔爲天上痴蘭院  
主脫去三塵毫無苦趣姚夫人尙不及我貴可請我母減哀思  
言已車馬如飛倏忽不見香風習習綵雲紛紛明日婆子來見  
張夫人始知五姑已於昨宵化去至今別鵲吟一稿士女傳誦  
價重雞林人第賞其詞章之工初不知其節操之貞與生死之  
顛末花耶人耶仙乎仙乎

沉香街

江南通衢有街名曰沉香詢土人以命名之義云富家子金姓名不換蜀人美丰姿財雄於鄉年二十偶閱畫圖慕江南風土之美金粉之麗山川之秀遂挾重資學賈偶遊於此街經桃花門巷忽一荔支叢墮肩頭仰視之珠簾繡閣一美女子憑闌顧之微笑訪而知爲娼家乃第十三女素喬也釵光鬢影魄蕩神迷遂入院女笑迓之肅入己之繡閣別有洞天茶鑪沸鼎香熱棋枰絃索互弄錚錚然生惑之幾不知身之所在旋即開筵酒肴精絕離姬五六輩來互相脩觴或素之姊或素之妹盡媚之生微吟除却巫山不是雲句衆遂盡散酒闌人靜解衣入帷素出十洲春冊照譜爲之魂更銷矣由是遂假館素喬家不復事貿易資耗盡素憂之生曰卿勿憂吾家雖不及鄧尉石崇然四

蜀亦著名富室也我以貿易爲遊戲耳盡暫歸取重資當訪天台素涕泣曰妾已委身事郎誓不再作章臺柳但恐瓜期屆而郎斷尾生信奈何生誓以天日曰劍欲會鏡欲圓請留一信物以當左券生笑曰小生囊橐盡入卿家更有何長物可贈素曰請鑿一齒以昭踐齒之約生怯痛素卽嬌啼曰郎非真愛妾者生恐佛其意卽忍痛與之素喜藏諸粧臺治酒餞行諄諄訂婚嫁臨別啼哭生衣袖盡爲素淚濕透生亦泣榜人催再四始判袂去歸則出資盛備青廬洞房所需者費二萬金將買舟往迎桃葉友人勸誡曰錢樹子多不義所以戀戀者爲有劉濤錢非爲濟安貌也生不信卒治任往巴峽下流匝月卽到甫登岸猛憶友人言未卜素喬之意誠否遂敝衣囚面携筐持竿詐爲乞丐詣素家素方坐大買懷中持爵勸飲焉見生若不識詈罵曰

姆姆病盲耶若不驅出便嚇狗齧脰股無悔也媼果持杖逐之  
生哀呼曰姐姐莫打我金不換也媼與素讀之確問何一寒至  
此以途中遇盜對素問爾至此尙欲何爲曰來踐卿約耳素笑  
曰我金玉錦繡中尙三日兩日病能爲丐人婦耶請君歸休無  
妄想生遂哀哭曰明知婚媾難但不久填溝壑乞卿垂憐賜一  
殮具費耳素冷笑曰幾見勾欄門化作施材局恐市上木樁空  
矣生又蹙額曰小生兩日無一餐腸鳴若雷乞卿賜一飯俾作  
飽鬼瞑目耳素不應媼意若憐以酸羹雜飯貯破陶器折稊與  
之食生且食且請曰約旣毀小生一齒須見還也素命媼捧巨  
筴出其中人齒列貝若貨假藥者生大怒擲器拂袖去將厨闕  
聞素在內大慄曰花郎好性氣明日盡以所携命人陸續扛至  
素家門首繡裳珠履不計外中有沉香牀窮極雕鏤費數千金

縱火焚之烈燄亘天香聞十里素聞之遂自縊嫗哀生生轉厚  
瘞之噫榮陽生豈少也哉世無李娃幸毋浪作墜鞭人耳又聞  
姑蘇曾有一娼名香儂居通衢朱門洞開牆懸虎牌門首黏示  
條屏縫絨丹封蛇鞭帷帽赫赫炫人司閨者龐然坐視耽耽如  
羅刹香儂小有才凡佳客到門必坐與司閨者語良久詢明來  
歷然後具稟稟云敬稟姑娘粧次穉稟者頃有貴客貌比潘安  
富同陸賈身有衣而楚楚家有粟而陳陳面同李貓之柔貨定  
張驢之大請添樹上錢毋韞櫝中玉伏乞照驗施行準賞雲雨  
曷勝恩戴云云須臾擲出批云據稟已悉細勘來人貌既不揚  
衣又不華錢必不多不准云云該毛毋得妄瀆此繳

慎儂氏曰娼家錢樹子認錢不認人此故態也何足奇所奇者  
金家郎迢迢巴蜀垂到姑蘇忽然醒悟饑來驅我得卿卿數言

能令千古有情人憐香惜玉之心一齊灰死當其拉雜摧燒時想諸天菩薩聞香而來必合掌而作頌曰苦海無邊回頭是岸登徒之流大家來看映火中燒出青蓮花敗子回頭金不換

### 小癩子

今有人焉於光天化日之中九陌通衢之地公然攫財物使行道者耳如不聞目如不見者誰歟蓋卽北之剪綰南之扒兒手也揚州東關有小癩子尤稱巨擘其先癩母本習猴婆技者癩之父操此術遊江湖間遇猴婆莫逆遂成夫婦而生小癩子年十五六其父母已飽食暖衣稱小康焉出資送癩子就村傳讀俾改業而癩性最敏呖唔之暇輒習弄好身手恐墮箕裘一日二老壽花甲座客方稱觴祝嘏癩子遽跪請仍習父業父躊躇曰兒能象賢原大好事然習則易而精則難所謂精者如承丈

人之蠅如運郢人之斧如射甘蠅之箭胸有成竹目無全牛遊  
戲出之俯拾卽是所謂如與可畫竹兔起鶻落少縱卽逝者也  
否則帶水拖泥動洲詬辱捉將官裏去一般斷送頭皮危何如  
乎業此者鍊目鍊心鍊手以我之目視彼之目以我之心印彼  
之心以我之手扒彼之手彼鈍而我靈彼勞而我逸彼垂而我  
起猶下乘也俟其靈而我故鈍俟其逸而我故勞俟其起而我  
故垂猶中乘也靈卽應之以靈逸卽應之以逸起卽應之以起  
始爲無上乘汝未習傳燈妄思跨竈輕舉妄動豈不貽老父憂  
乎曰兒已習之矣請大人面試可否然後出門攬行人父尙猶  
夷衆極憊愚癩更自誇父曰姑試之二老登廳側小樓憑欄下  
顧呼癩子使賺之下癩子故搔短髮作徘徊狀告衆曰由高自  
卑誠非易事若二老下堂階吾賺之登絕頂尙易如反掌況區



區一樓乎父聞之卽拾級下曰是依機也盜賺老人上樓癩子再拜曰旣賺下矣更何上焉父母與衆均大笑賞其靈妙疊試均有巧思遂任伊所爲日獲甚夥時有鹽商江某老而淫婢妾外更廣集大脚仙薦枕席一日鮮衣便服小坐肆門眺矚往來淪茗爲樂小癩子嬉戲肆前見江某遽鞠脰問安否江笑罵曰秃賊兩目如椒垂涎吾手中物耶癩子連稱不敢然亦不去適肆中執事人看元寶江笑擎一寶語癩子曰吾夙諗汝神通大元寶置案頭吾坐守之衆目瞰之爾能炊許時公然攫寶去使吾與衆均不知卽以寶賞汝否則再至吾門當以大杖敲折狗脰股癩子笑稱不敢江又言之癩子略凝視遽屈膝仰首曰公眞慷慨惠賜小人耶曰誠然曰如是當預謝賞言已卽去無跡江端坐目時顧寶忽一妖豔大脚仙年甫十六七內着綺羅外

罩布素滿頭花朵雲鬟堆鴉裙下蓮船新花屐上身衣雪青  
比甲扎月白繡花汗巾挾柳筐內承麥麪斗許飄飄從東來粉  
汗浸淫櫻口喃喃若深怨柳斗之重至門首見江翁撫案坐故  
止步笑曰且小憩片時量午餐湯餅尙不過遲旋有數婦人陸  
續過門問女曰巧姐竟親執其勞耶不怕閃壞嫩腰肢累主人  
心疼女怨曰無奈何阿六官忽思啖湯餅所幸大脚能走那怕  
踏破多子街江瞰其冶容已神迷又聞其嬌語更心動情不自  
禁遽問曰小大姐爾主人誰耶女歛笑正色曰堯堯巷東首羅  
大官也江曰此吾之至戚何絕未曾一見子女笑曰奴記曾識  
翁面但不知姓名翁貴人那有下眼覷賤婢翁謙遜漸入謔浪  
女不怒惟含笑小酬應翁令其辭羅就彼女似許可旋問曰翁  
痴耶坐守元寶將以炫路人耶曰非也遂曲折道與小癩子相

賭之由女嗤然一笑曰翁莫門人要是必假元寶若真矣翁卽  
富何肯以之作孤注翁極言其真舉寶使女自鑒女果倚案捧  
寶審視翁笑曰此吾家所最夥者汝若肯來何愁無十數枚女  
大笑釋手誤墮柳斗麪中失色曰殆矣急從麪中捧出取袖中  
羅帕拂拭而後置翁前曰幸不跌損然奴幾驚破胆矣翁曰痴  
妮子幾見有元寶跌損者乎女曰貪看元寶惹此多時恐六官  
又着急奴去休言已忽忽挾篋向西去翁方與衆月旦女貌若  
何言辭若何衣飾又若何小癩子忽含笑來徑詣翁前伏地拜  
謝厚貺曰我元寶具在也曰翁寶已化爲鉛矣真寶已家賜呈  
小人父母儲篋鑄之固翁細審案頭粲粲者果爲鉛鑄詢何  
術曰頃來尤物乃小人之妻與翁喋喋時已由麪中更換去耳  
翁始恍然乾笑曰便易煞髡賊至咸豐四年粵匪陷揚時小癩

之父母已逝妻與妹均送至鄉間賴一身時至城中偵虛實每擬乘隙刺楊秀清不果富家眷屬多藉賴子奇計賺出譴楊賊左右有大半三江人遍結納堅訂裏應外合之計出投大營詳告營主當事者不深信叱出再欲有言即將傳令斬禿賴賴驚逸仰天大哭曰吾幼不肖學做扒兒手今老矣思捐軀粉骨以報國家奈其說不行尙有顏面與若輩共生活乎遂挈家遠竄不知所終

穉聶歿爲文信國公冥墓

按宋鑑恭宗時陳宜中因柳岳還復奏遣宗正少卿陸秀夫呂師孟等同龔加歹使元軍求稱姪納幣不從則稱姪孫秀夫等見伯顏於平江伯顏不許宜中乃白太后奉表求封爲小國太后從之直學士院高應松不肯草表改命京局官劉裒然爲之

岳等至高郵嵇家莊爲義民嵇聿所殺夫聿一民耳其忠憤果敢如此吾邑北鄉臨大湖有城門鄉土人云卽宋之天長關至今名爲小關城垣廨署基址猶存隔湖三四里宛在水中央有生聚數百家卽嵇家莊衆嵇所居聿之子孫也足徵宋時此處尙有陸路可通是必柳岳過江由眞至長由長往郵道出嵇莊始爲聿殺耳尤奇者前明樞密院羅萬象清鯁不阿正笏垂紳有大度曾爲天長宰政績甚夥鄉人愛之如慈母鼎革後隱於城門鄉自號湖濱旅客黃冠草屨隴畝經行田衣泥屐輩見而忘其爲舊令尹也公猶勸植農桑教義學子弟忽一夕夢一青衣來招曰主人傳語奉迎玉趾隨之行入一朱門殿宇偉麗主人出揖而就坐視其狀貌如王者綠袍珠履鬚髯飄飄謂公曰吾血食於此廟中饒詩俚俗鄙惡真牧豎子語敬知先生一代

才人衙官屈宋敢乞賜以珠玉爲冥冥增輝公請載拜退踰闕  
驚寤以爲夢幻無憑不甚信明日又入夢王者誣譏尤切切醒  
異之偶遊關之城隍廟庭階曲折依稀夢遊視壁上錢詩果但  
然公究素慕王陽明理學不以此爲事是夕假寐夢兩侍者來  
狀如古之虞候招公曰速去速去主人候久矣公若疾趨隨之  
行視殿上仍前王者色甚怒曰何吝才是區區者尙欲效東西  
賦研之十年耶責讓嚴厲公再拜曰鄙人魯拙機滯憂患膺心  
亂離亡命風雅事久已拋却然旣承隆委敢自諱其拙耶容卽  
擬議求教王者色猶怒旁有冠帶客修髯面白皙若幕賓狀代  
公緩頰甚殷色始霽卽命送公出拱而別遂問客鄉貫姓氏曰  
宋之殺降表者卽某是也對湖大村落習耕讀者皆某之子孫  
問王者何人曰禁聲以指畫公腕書曰文山相國公驚醒盥沐

作詩三十首清麗纏綿溫柔敦厚繕稿焚之神前而後書木懸之壁自叙甚詳并云文山先生與其客杜濬等亡入真州苗再成給之出抵揚四鼓矣聞候門者曰制司下令捕文丞相先生窮促無策素聞嵇名乃反馭訪嵇嵇迎之於家事之甚謹因而慷慨泣下散家資招健丁復遣其子與客伴送文山先生至泰州航海達閩生前道經於此歿卽爲此鄉之神亦理之不可解者至嵇公歿爲先生幕中客豈非訂生死交與前曾遊廟堂悚然瞻仰中殿肖信國公像少偏肖儒衣冠者正襟危坐英風俠骨凜凜如生卽嵇公像也聞之土人云羅公卒於是鄉葬長亭四圍多孤塚泛泛若水上鳬余時擬出資爲公加封植立崇碑叙其事且肖像於信國右宛與嵇公對峙血食千秋惜阮囊依舊奈何

懷儂氏曰由宋末至明末相隔垂四百餘年文公生爲河岳歿爲日星何尙拳拳於彈丸小邑哉讀其詩集過嵇莊句云小泊嵇莊月正弦莊官驚問是何船今朝哨馬灣頭出又在青山大路邊當其亡命流離猶復吟詠自如良由定靜羅公以樞密之偉望隱嵇公之故居作野老之哀音荷忠魂之隆委所謂聲氣相通者非與羅公宰吾鄉時曾詣汶礪大覺寺拈香甫履寺閭愕然以驚恍然若悟預問寺中廊舍聯額語無不符蓋公之前身爲寺之住持僧也因題其額曰相看在此由是觀之如三君子者可鼎足而不愧乎神

### 喪事演劇

某邑某宦以進士宰於粵迎養尊甫某翁翁歿宦扶櫬回鄉里時伊伯叔均科甲作顯官勢甚熾故靈輜之回也盛誇耀騶從



鹵簿排列長三里里之紳衿無老稚咸公服出城翌次日領拜  
夜夕行招魂禮銜牌傘蓋魂轎香亭悉假城隍出巡燈會上五  
色琉璃者易字爲之而各家又出兩明角燈桃諸竿遣僕持之  
前驅龍虎獅象燈又雜出於鹵簿中火樹銀花遠望如火城名  
爲招魂寶則張燈鼓樂喧闐冠釵雲集自宵達旦綴綴繞街行  
各家又設祭筵擺供具金玉花草異寶奇珍香風撲鼻魂轎到  
門主人拜宦答拜拜已優伶唱戲文以媚亡者名曰獻曲正譚  
亂問突一某茂才盛服擠墮路旁厠幾沒頂大呼救人按之出  
臭味羞池矣一市大譁友方掩鼻慰藉而茂才顧僕曰急曰蠶  
才速取冠帶來這一跪三叩禮是萬不能少者友有旁觀冷眼  
惟聞鼓吹聲人馬雜沓聲孝子假哭聲僧道梵唄步履聲茂才  
若急聲友人慰勞聲路人相戒聲聲有不同迴歸縣太翁係於

後堂客與主人下及執事奴僕均擲去白衣冠更吉服撫掌歡躍曰太翁歸也開筵款客堂下演劇須臾五色臉登場金鼓大震客有題其額云弔者大悅聯云弔者在門賀者在室哀不可過樂不可支

穀於菀

明季青魯山中嘗有虎患有山家小女子年十二携斧入山樵採以助炊偶失足墮山谷中下皆落葉得不死然上視壁立百餘仞無階梯高聲呼救繼以哀泣終無應者女視東壁有洞內空闊若夏屋伏兩乳虎馴若猫犬女至虎窺愈怖知必死樂與乳虎嬉夕照墮嶮巖腥風突起虎母歸見女始大驚繼見女抱乳虎於懷嘻嘻了無怖又瞠目良久卽坐引乳虎哺哺已將眠女叩拜曰兒蒙大王憐我不殺我尙能分乳救我飢乎虎凝思

又良久領自若背女郎逡巡就虎食倦卽眠虎領下嚮晨虎母  
舐乳虎兼以舌輕舐女面然後躍出至晚歸銜果餌置女側女  
笑舞虎母意亦甚樂月餘乳虎漸長成虎母遽負之出洞女大  
號虎俯瞰又良久重復躍下負女於背一躍而升高處女於斯  
時屢再生也虎引女至通衢女拜辭虎猶回顧頻頻而後去女  
抵家見翁媼方手之舞之足之蹈之歷歷述遇虎得生狀翁媼  
曰嬉安有遇虎反生者耶是必爲虎食死爲侵歸時人將引全  
家葬虎版此偃爲厲也豈得爲吾女女號哭再三辨莫能白因  
閉之室不與以餐女轉餓將斃號救亦無一應活力竭聲嘶待  
斃而已翁媼夜同夢一黃衣婆子來努目視曰汝女郎卽吾女矣  
若餓斃當殺汝一家驚醒覺怒吼聲猶震林木間也至是始釋  
女囚女自服虎乳長而貌益艷有勇力少年將軍某聞而聘之

屢屢助戰功封夫人

懊儂氏曰女不死於虎幾死於骨肉可爲奇矣嗟乎古之孤臣孽子血凝腸劍禍伏寢門山鬼朝游岸有行吟之客妖狐夜泣庭有待罪之人沉鬱悲涼有至死而不能見諒於君父者恐山君聞之亦當爲之不平噫安得千萬億白額遍爲夢中人饒舌耶

丐癖

花根雲行二十天台儒家子貌翩翩性嗜讀幼失怙恃年十四卽補博士弟子員戚里推爲國器欲妻以女笑却之詢何故曰我命中雖無十二釵然絕非田舍翁抱着黃臉婆子眠一世者家赤貧日把卷不顧竈突應同人偶拉往東郭觀戲甫一二閱卽稱賞又演滎陽公子教歌覺鰥寡孤獨之流疲癯殘疾之輩

弄蛇牽犬刻劃盡情生大樂曰妙哉此天人菩薩現宰官身而說法像也人以為顛生曰丐也者不識不知無拘無管以天地爲籛廬以日月爲燈燭以江河爲襟帶以木石爲友朋歌哭無常叫號隨己是真薄諸侯而不爲比散仙而無愧者何樂如之時生有遠族伯叔行胞兄弟者四業半儒賈產極膏腴有德曜妻抱鄧攸戚偶中秋邪相繼殞謝銅山萬丈悉歸四婺婦撐持議擇嗣未決族之無賴者乃蠅集謀瓜分廳事几榻不羽亦飛田畝佃人被脅咸逸流言四布不止穿窬婺輩稍理即橫目爭曰寺人產耳孰不有分哉婺憤極鳴宰宰止諭速立嗣承宗祧婺叩首曰族子皆豚犬耳與其遺風木憂盍若視亡者成伯道今乞賢宰官出示與族人約凡子姪行無論遐邇但秋試一獲解卽嗣之否則未亡人寧乞不怨也宰曰善卽示懸里門并花

氏宗塾族咸惶惶作希冀想然掘臨時井又自悔其泥茂才花  
根石富不仁亦夙涎幾產者泥生作捉刀人雋卽酬千金生正  
苦錢澀卽乘使之錢店同舍館石時出宿勾欄生獨居忽一褐  
衣人質質然來問生曰君花茂才根石耶姑應之曰然曰曷試  
言長上名字事蹟石父本生叔卽詭告且確袖出一函與之曰  
此家主所持贈者闕莫示人揭曉來討喜觴飲耳言已卽去生  
潛閱之闕中關節也蓋石父亦明經有富名嫌官某與有素媚  
之希豐酬適來者价也生懷入闕草草與石文自則略經營嵌  
關節及榜發石落而生魁矣榮歸在途方自慙蓬蓽湫隘比入  
里門而四嫠已擁之至家滿堂設紅氍毹壁上泥光可耀目會  
宰亦呵導來賀生錯愕不知所云嫠出叩謝玉成生則再三辭  
宰曰是有議約何必辭立命冠服入叩四母與亡者木主禮成

始去嫠呼生曰得汝爲子足爲婦孤吐氣家中不少阿堵物聽  
揮霍不吝也生拜曰諸母有子若揮霍是何異外人之鯨吞但  
兒冠尙未娶意欲娶兩婦一爲本生潔蘋蘩一爲諸慈奉榛栗  
嫠笑曰吾輩本意爲兒聚四婦頃如兒言卽娶五婦何如生拜  
謝昕夕定省如所生嫠亦鍾愛如已出凡一裘一葛製必四恐  
其判低昂也然生則以來時敝衣私扇一篋不肯棄一朝有戚  
屬諸人坐廳事大聲呼生名嫠爭出屏後大罵曰狗彘奴尙敢  
爾耶我輩有孝廉兒寺人產具在焉再攫乎言已呼僕縛之公  
庭敲斷狗脰股諸僕噉應聲若雷明日臂露筋執索將繫維戚  
惶急搖手曰何敢爾何敢爾我輩來與賢郎作冰耳曰姑畢其  
說曰里有富室劉嬰老無子惟五女皆諸妾所生年相若極友  
愛嘗園中設誓願同事一良人頃聞賢郎力能享五美故倩某

等來，執柯縈始唯唯，改容遜謝。然婚議成，究倩里之素有德望者代月老衆，惟酬以酒肉而已。親迎之日，陪奩極豐，與一隊如鳳集如鴉銜如魚貫，固已奇矣。而縈更招優演劇，生且請於是日設廠賑流人，鼓樂絲竹與乞食誦佛聲相錯雜，則尤奇也。却扇後視五女皆美絕倫，燕瘦環肥各極態度，香溫玉暖互鬥。尹邢孟曰：璧月仲曰：香月叔曰：好月季曰：瓊月五曰：今月姊妹善事姑與良人年餘，毫無爭夕事，生自嗣四縈也，手不拈斑管，目不覩制藝，足不踏塾門，惟豪飲鼓哀絃，挈同好串繁響，初猶奉母斑衣學老萊子，後漸閨中乞食學韓熙載，久卽村人賽會生亦粉墨登場歌喉一聲，諸伶拜下風，觀者呼絕調矣。縈稍諷勸，勗以南宮生笑曰：兒命官雖有些頑福，今爲閨中艷福，折算盡矣。若再痴望，恐促生年，母亦何樂有此短折子哉？故不爲也。



年餘璧香好瓊四婦皆生子試啼聲知英物而五娘今月尙未  
姪生詫曰豈老天尙不欲我逸哉由是日與今月嬉曰而今而  
後卿當視吾目若巧流盼卽二五妙合時也今月戲曰行當參  
乞人子爲兒免耶笑我不作繭越兩年四兒皆呀呀學語而今  
月亦孕然尙未知離之雌雄生卜於伍相祠筮曰巧巧巧心事  
了回頭宜早俗塵宜掃生玩之啞然笑曰是其時乎翌慶次母  
誕絲竹之聲遏雲杯斝之流泛月生突入跪白四婆曰兒所以  
能生子者父之蔭母之福非兒所有也諸母他日各抱妻各教  
婦勝於日對不才子兒事畢兒去矣旋揖五婦曰卿等有兒好  
努力做人家無以我爲念僉詫其妄生仰天大笑曰索逋而來  
逋償而去何妄之有是夕猶問諸母安否晨則潛更來時敝衣  
飄然遠引矣僕四出尋之無蹤跡一家哭失聲是年夏五今月

亦生子悲喜交集然無如何旋有鄉人自豫來者云生入優人班敝衣囚面坐場後點腰鼓神色恬然又有自魯來者云近更落拓日困卑田院拍板搖鈴唱蒿里曲以度日然尋之則均於先夕遁去想卽當日所謂樂者今樂其樂矣生之五子也孟曰環仲曰琅叔曰琥季曰珊五曰玖皆穎敏早入泮又數年琅補邑明經環珊均鄉魁琥中明通榜進士玖食廩餼太母四均長齋繡佛委家政於婦大太母壽八十五孫環視於庭潸然曰汝皆成名亦知尙有父乎乃涕不可仰跪求祖母訓曰昨夢菩薩指示云汝父乞食於瀟湘岸上當往晤一面了父子緣環等遂束裝謁蹶往至湘水凡有城郭村堡無不暗物色偶至飛瓊村爲張團頭者凡流民皆爲所轄衣冠往咨詢張恍然曰公子來耶大奇大奇渠三年前由豫習至此遇乞丐有恩德昨正盜

雞斬狗一同飲廢寺中忽東望良久擲盃大哭衆驚詢渠曰我  
天台花孝廉也明日我兒來捕我歸奈何衆額手賀渠大不樂  
衆曰我等知君之心矣誠恐一朝返初服必遭吾輩擾今願懇  
神誓君易歸休渠曰善痛飲達旦衆斲駒而渠已無跡矣衆丐  
頃正各處尋而公子等竟真來耶兄弟泣挽張引之飲處則破  
瓢挂壁短竹倚門跡如故也尋守幾月餘始厚酬諸丐痛哭而  
歸明年四發先後逝服闋琅出官隣邑廣文瓊珊均大令一宰  
豫一宰魯瓊官皖大方伯致家居守墓田瓊珊生母均多病遂  
各奉其母以居瓊在皖一日車騎出忽有少年丐者犯鹵簿左  
右正呵叱丐含笑擲紙裹於地聲鏘然且曰乞人寶此無用請  
歸遺太夫人書已行甚速追莫及拾而睇之則一金釵嵌巨珠  
者呈於母母泣曰乞人卽汝父也釵吾舊飾亡已久今特送珠

還哉又環捧檄之東魯藉以看弟珊出親東郭門班荆甫坐忽  
見一少年丐倚牆捫虱且高歌曰雪中人是將軍種口角蓮生  
極樂花兄弟心異之趨與拱揖唾不顧再詢之則槎屑圻成二  
巨丸分與之曰毋多言貧此可療婦人病言已跛而去瞥即杳  
然歸各與母服病果瘳又攻因家事往詢兄琅道遇一窮男子  
插草賣畫幅展閱之則雲樹敷重一少年仙風道骨飄飄走山  
嶺作探藥狀問何來曰我母貧無以殯痛將死忽一道流假  
村塾楮墨自寫小照與我曰待往可售二十千尙不敷戰身具  
耶方叩謝其人頗渺致愛其筆尚不昏如數購回琅閱亦莫解  
惟琅生母知爲阿翁小像旋亦槁歸呈母且述所以母泣曰汝  
去後汝父亦於是日負包裹回儒衣冠極華瞻初不類丐我方  
驚喜渠云二十餘年不歸矣且先省殯官然後道契闊我因藏

其包裹同之墓奠畢忽大風揚沙日色昏黑我堅抱之恐其逸聞雲際大聲呼曰僕非丐根然有丐癖煩卿寄語兒曹寧有丐父不可有丐子丐孫也天霽視所抱乃一枯松樹時閱包裹則去時所着之敝衣明年兄弟偶團聚互述前事蓋見於醜見於魯見於鄉里者皆此一日一時耳懸像中堂哭拜作禮紙上神情與所見皆酷肖乃索題於當道諸父執莫不欽佩曰此由儒而丐由丐而仙天台之花孝廉也而孝廉遠矣

懷儂氏曰花孝廉一瓶一鉢雲水往來當其撒手懸崖視妻子如敝屣亦何其忍哉或別有慧根知滿場袍笏終有散場時耳嘗謂富且貴者人視之誠神仙不若己視之亦南面不易而仙人視之則桎梏其身醜毒其性不過成一可憐虫乃彼不自憐猶津津罵花孝廉曰是不肖薄福兒也是無知怪誕人也噫愚

矣

路九郎

新秋涼夕兒女子篝燈砌下捕秋虫名曰蟋蟀又曰促織聞得  
英物哺以蓮粉飲以花露宅以定陶出與同好者角勝負排翠  
籠携白打狐注一擲常千金吳兒尤嗜此有賈秋壑之遺風焉  
姑蘇銅井農家子路九郎家本小康父卒屢荒歉故貧其母恒  
鬱鬱賴九郎性至孝晝爲人傭夕必歸爲老母伴寢年老人不  
能熟寐九郎坐床頭絮絮譚俚典唱山歌博歡笑是年夏爲人  
家傭插禾出兩崦外歸稍遲母每策杖倚柴門痴望感風遂疾  
日漸昏瞶九郎辭歸主人憐其孝以傭資盡與之俾謀藥餌九  
郎衣不解帶時於暗處泣剗左臂肉和藥進不應又剗右臂仍  
不應且傭資將竭而二豎未除大慟晨夕焚香禱於村首小土

地堂江南鄉人往往用大甕破缺者覆地爲神祠祀甚虔九郎  
素聞城中有神醫葉天士名震海內奈聲價太重凡病家邀請  
肩輿侍從費必需沽酒數自顧何力能致欲負母往旣恐爲司  
閽人阻又路遙病劇難孟浪然醫旣有葉若不盡人事則他年  
風木更爲遺憾思積若迷更禱於神曰土地靈葉公來土地靈  
葉公來日夜禱數千遍一夕母小睡甫合眸又往禱旣而思解  
以斑竹煙筒就香吸淡菰菰往坐厠上口猶喃喃禱如故煙完  
以煙筒敲地禱且涕適銅煙鍋脫落躍入草際起鱗鱗袴暗摸  
索不可得急回屋簾燈往覓仍不得惟聽拳石下有虫啼聲甚  
烈異之掀石而虫遽躍入襟上試捫之已伏腕中歸而養以陶  
器就燈審視軀雖纖小而金鬚蝶翅雄傑非常再往田野捕一  
二頭與之鬥輒針下死擲盆外因思葉公最愛虫正開門延諸

費公子作秋聲會若以此往獻或如願迺供虫於几上焚香再拜曰虫吾母生死繫爾軀明日見貴人幸無作羊公鶴也輾轉終夜不能寢天明邀隣媼伴母自云進城量藥潛携陶器往行如飛進城詣葉門日甫上三竿車馬紛紛來去甚夥卓午人散又僦腹男子三四輩鮮衣砑幅嘻而坐門首僕也九郎不知揖與語求導引面獻異寶僕見其衣襪襪以布巾裏陶器嗤曰去休痴弟子何處摸得小么麼以爲寶得毋引主人齒冷雲時咸鵠立葉公盛服出將乘輿九郎急趨而跪捧器獻僕叱之去公曰莫驚他又顧九郎曰爾携來作麼生九郎嚙嚙述虫之異葉笑曰其油葫蘆耶九郎未及答虫遽於器內鏘然一鳴葉驚聽曰取器來揭而斜睨久之曰仍付爾盍於門側少憩我少頃回當面驗之須臾果回坐廳事呼九郎入取虫易磁盎內視良久



呼取蟹壳青來鬪之敗又呼取麻頭辣來鬪又敗大駭急呼取金翅玉頂大將軍來所謂玉頂者隔年黃蜂所化性烈而鉗毒鬪無敵九郎見之心躍躍幾從口中出見所進虫若伏雞玉頂則昂昂若怒猊鬥十餘合虫突躍起尺餘落而登玉頂背上齧其領葉急取草穗解之而玉頂已水出僵矣廼大珍異問從何處來需價幾何九郎跪白曰小人非售虫者偶得之呈諸貴人取芹獻之意曰爾窮漢子必有所求盡明言之九郎乃跪白所求曰是何難遂詳問姓氏居址告之詳且述致貧之由頃爲前邨樂大戶守道遂就冬青樹頂纏枯藤下三間老屋中住葉撫掌曰真有緣樂大戶妾素粧娘子正有恙邀我午後往因留九郎飯自捧虫詣內宅笑不掩唇飯已葉乘肩輿卽隨之歸葉感九郎誠先詣其家九郎煩隣媪烹清茗潔榻掃地忙不了葉止

之卽詣病者診再三笑曰爾母何至死取丹藥四顆與之命卽服且約隨至大戶家大戶盛服出迎禮極恭茶果飲宴皆宿備入內診出謂大戶曰如夫人清恙頗棘手奈何大戶憂之甚葉曰幸有僕在量不至玉隕香銷動遺掛悲也判方訖大戶呈朱提百兩先爲長者壽卽取與九郎曰爾母非病乃暴貧難堪鬱於中耳元寶湯當勝於苦水萬萬盍携去備救水九郎不敢受堅與之始受葉去九郎以金呈母至夜呼米飲神頓清三日葉又至大戶大呼九郎急奔往叩謝葉挽之意甚殷蓋連日以虫出與吳中富兒角無不利得綵至千餘金問樂曰僕欲於瀛第左右置膏腴二十畝有之乎曰吾族人有所畝如數卽在九郎屋後正欲售問其價曰問須五百金葉笑出三百金曰以此作訂餘續繳可乎曰長者無慮某當玉成以報德入內取二百金

邀族來卽書券葉命署九郎名書就付九郎曰是可博瑩堂歟  
乎九郎辭不可已飛輿去由是九郎移家奉母就佃宅住居甚  
敝非從前之湫隘矣五日忽大戶家遣媼送哭婢名懋娘者暨  
服至門曰葉公函索主人婢子贈爲汝家婦言已媼卽忽忽去  
九郎喜極無所措而懋娘竟曲意事姑孝夕則就母脚後宿明  
日葉又遣送妝奩衾枕之類來傳語諏吉成嘉禮蓋樂妾已愈  
而葉又得采蓮前盈五千金九郎偕婦往兩家謝均豐餽由是  
家暴富勝於父生時其母病魔更飛去無跡一日正母子夫妻  
計譏酬葉公德忽僕來呼甚急奔去見葉坐廳上神色俱變大  
恐伏謝曰由其敗北乎曰非也由究何處得九郎遂縷述禱神  
坐廁尋鍋得虫之由曰煙鍋尙在否曰至今尙烏有曰吾還爾  
煙鍋可乎卽於袖中擲與之視之如故葉曰大奇昨猶猛鬥忽

創益內化爲此聆子言安知非純孝感神蔭耶九郎願繳所贈  
笑遣之廼齋煙鍋回九頓首奉之如神又兩載田大穫學買又  
得利家更富遂以田直還葉不受其時老母已古稀猶健飯爨  
娘又生子遂出資建土地祠院宇偉麗乞葉爲文泐石紀事九  
郎事葉如父所需無不經營奉之葉嗜食斑鳩逐日從獵者張  
北山羅葉後得奇疾病嗜啞其子憂窘遍集名醫不得其源將  
斃九郎禱於土地宿廟中夢數人担生薑來煮於庭煙氣上蒸  
化作斑鳩飛去醒而誌之往告葉之子不深信九郎逕冒霖盈  
担以大鑊煮寢門外火炙鼎沸人皆欲隨而葉聞之若甘因移  
於房闔又移近牀第炊許葉忽大聲呼曰悶煞哉吐痰塊成餅  
疾頓瘳問誰進此法九郎以夢告葉籌思久之遽問班鳩在田  
中食何物曰生半夏乃恍然悟曰神其精岐黃術乎抑子之精

誠所感乎吾食鳩中半夏毒非靈莫解真再生也遂出資爲土地建寢樓益厚遇九郎自是不敢食鳩而虫好如故至今姑蘇骨董家尚有葉公所製秋蟲益製絕精雅

澳儂氏曰社公地祇之流也冥冥中品職最卑者蠶療鵠或格物之功化銅爲蟲何續命之捷豈真九郎孝念之所感耶抑社公神通尙別有術耶噫誰非人子誰無父母吾願家家戶戶當奉此社公爲消災延壽藥師佛

### 髮繡佛

東海掠網寺藏有繡佛一幀綾本長二丈四尺橫八尺佛像料頭披髮面如滿月胸前繚絡垂如蛛網左手當胸宛撫卍字右手秉羽扇下垂水紋袈裟袒右臂赤雙趺危立龍頭龜背上若鼉龍伏體半身在海濤中四足擺簸舉頭張吻吐白毫升空成

樓閣臺榭日月山河其下則飛蛇飛魚蠨蛸水母爭來朝拜怪  
怪奇奇佛目微睨慈悲苦惱意甚垂憐其上則金經全卷蠅頭  
小楷粲如列眉末注嘉靖某甲子優婆夷女弟子葉頻香盥沐  
髮納幘左空隙爲伊戚丁尙書草隸序繡佛顛末文甚長不復  
記憶謹綴其略云浙人葉公大鍾以翰林官侍御秉性鯁峭時  
以白簡劾當道權貴屢分宜遣以書詰鼎彝悅公心公叱却之  
効益力未幾難作海盜冤扳公曾行賊革職廷杖幾死詔收刑  
獄論斬公子伯仲皆知名士束手無策公女號蘋香貌溫婉性  
至孝聞公陷死地日夜禱於神得感應年方十四齡善刺繡爰  
市巨綾自摘頭上髮以金刃薄如稻芒者擘作四縷繡佛與金  
經二載始成功德滿目而公亦邀天恩以金雞詔出獄矣由是  
挂惠文冠退老林下不復預朝政女自繡佛目力已竭雙瞳遽

盲中無與論婚者公年六十病卒女年僅二十有五彌留時  
涕泣握長次兩公子手囑善視盲妹無令窮失所兩公子泣受  
教詎兄雖謹奉遺命而兩嫂妖牝司晨時譖小姑懶惰漸加詬  
厲女日夜哭兩兄亦深惡而痛絕之矣忽有崑崙女丫髻綠袴  
褶舉止閑雅翩翹到門向女曰姑姑病目坐耗神損肝肺非真  
盲也妹能盜得天河升斗水爲姑姑銀海生光但瘥後何以酬  
妹德曰妹神靈能使地獄人重見天日無不如命曰姑姑善繡  
乞繡雙鳳一紅一白爲天孫下嫁助粧但勿遽點睛恐其飛去  
也女曰諾崑崙女袖出金篋稍稍刮大小眦淚泫泫如鉛瀉然  
後袖出小玉瓶中儲甘露如人乳傾滴眶中囑冥坐炊許啓則  
雙瞳中更有雙瞳光更清澈又與神膏服之胸懷恬適鬱憤捐  
除明日果市巨綬來視女手安於幘每日來指點繡絲線理花

樣翻新告成之日卽來替女點鳳目雙鳳忽栩栩活飛落中庭  
鼓翼如待乃携女各跨一鳳乘雲飛去家人咸仰首呼蘋姑不  
應崑崙女撥雲下視曰下界人不須驚訝蘋姑至孝感動上蒼  
天孫遣使奉迓補天上針神缺從此化去量不再累嫂嫂看顧  
矣通城士女無不見女冉冉空際若畫圖焚香祈禱呼蘋姑聲  
如雷兩兄愧悔無地嫂不爲怪也

襖儂氏曰吾鄉山中有鳥當春夏之交且飛且鳴曰嫂嫂虧姑  
鳴至新秋始已聞古有小姑受嫂凌虐死精魂所化者蘋姑雙  
瞳已盲聽此得無墮淚幸至孝感動天仙盲目復明偕登雲路  
兄固知悔嫂獨恬然彼英皇之愛敕首獨何人乎唐人書三日  
入廚未諳姑性之句何其親切而有味也